



XUNTA DE GALICIA

VICEPRESIDENCIA E CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA
Secretaría Xeral Técnica

Edif. Adm. San Caetano, s/n
15781 Santiago de Compostela
Tif.: 981 544 513 Fax: 981 544 601



DILIXENCIA DE CONSTANCIA

Esténdoa eu, José Ramón Pardo Cabarcos, subdirector xeral de Réxime Xurídico, para facer constar que a memoria que segue, que leva por título *Memoria Xustificativa do Convenio de colaboración entre a Vicepresidencia e Consellería de Presidencia, Administracións Públicas e Xustiza, a Universidade de Vigo e a Federación Galega de Municipios e Provincias para o impulso, difusión e mellora da transparencia na Administración Local de Galicia*, é unha imaxe obtida mediante o escaneamento íntegro da memoria orixinal, que foi asinada de forma manuscrita o 14 de febreiro de 2018.

E para que produza efectos cara a súa inscrición no Rexistro de Convenios do Sector Autonómico de Galicia, asino electronicamente a presente dilixencia.





**MEMORIA XUSTIFICATIVA DO CONVENIO DE COLABORACIÓN ENTRE A
VICEPRESIDENCIA E CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA, A UNIVERSIDADE DE VIGO E A
FEDERACIÓN GALEGA DE MUNICIPIOS E PROVINCIAS PARA O IMPULSO,
DIFUSIÓN E MELLORA DA TRANSPARENCIA NA ADMINISTRACIÓN
LOCAL DE GALICIA**

A Comunidade Autónoma de Galicia ten atribuídas estatutariamente, entre outras, competencias exclusivas en materia de réxime local, correspondéndolle a ditos efectos o desenvolvemento de políticas públicas para garantir un axeitado desenvolvemento das obrigas legais.

A Vicepresidencia e Consellería de Presidencia, Administracións Públicas e Xustiza é o órgano da Administración autonómica que ten atribuído o exercicio das competencias de elaboración, proposta e execución da política do Goberno galego en materia de administración local, en virtude do disposto no Decreto 72/2013, do 25 de abril, polo que se establece a estrutura orgánica da Vicepresidencia e Consellería de Presidencia, Administracións Públicas e Xustiza e se determinan as súas competencias, modificado polo Decreto 11/2015, de 5 de febreiro.

No mencionado ámbito material, constitúe un dos obxectivos da Xunta de Galicia no eido local o compromiso de colaboración e apoio no cumprimento da normativa en materia de transparencia, configurada pola Lei 19/2013, do 9 de decembro, de Transparencia, Acceso á Información Pública e Bo Goberno.

Dita lei susténtase en tres piares fundamentais: o primeiro, ampliar e reforzar a transparencia da actividade pública; o segundo, regular e garantir o dereito de acceso á información relativa a aquela actividade e o terceiro, establecer as obrigacións de bo goberno que deben cumprir os responsables públicos. Dentro do seu ámbito de aplicación, atópanse os concellos como destinatarios de boa parte das obrigas que dita lexislación establece.





A Federación Galega de Municipios e Provincias (en adiante FEGAMP) ten entre os seus fins, a representación e defensa dos intereses das entidades locais, a promoción das competencias locais e calquera outro fin que afecte ou incida de xeito directo ou indirecto nos seus asociados.

Para contribuír ao cumprimento das novas exigencias no ámbito local, a Xunta de Galicia xa habilitou unha plataforma web como instrumento para facilitar a todos os concellos galegos a aplicación das obrigas en materia de transparencia recollidas na lexislación estatal e facilitar á cidadanía unha ferramenta de consulta da información relativa á actividade da administración local. O espazo está aloxado na web www.eidolocal.gal e dende o 10 de decembro de 2015 os municipios que así o desexen poden usalo para facer pública a información ben directamente, ou ben enlazando con outras plataformas que xa tiveran en marcha. Este espazo posibilita, ademais, ampliar a transparencia da actividade pública, aglutinando determinado tipo de información actualizada referida a actividade da mesma, facilitando así a súa consulta dunha forma clara, estruturada, entendible e de fácil acceso.

A Universidade de Vigo, ao longo dos últimos anos ten levado a cabo numerosas investigacións, publicacións e xornadas formativas en materia de transparencia local que están a ser de grande utilidade para facilitar a implantación e o desenvolvemento da lei estatal nas entidades locais galegas, especialmente naqueles concellos que carecen de medios suficientes para facer fronte a estes novos retos. Conta cun grupo de expertos de gran experiencia e un importante coñecemento do escenario local en xeral e galego en particular. Trátase do grupo de investigación GEN que desenvolve a “Red Localis”, Rede Local de Administración Pública de Galicia e que está integrado por expertos recoñecidos en materia de transparencia local, tanto do ámbito universitario como profesionais en exercicio do ámbito local.

Neste eido, as tres partes asinaron, o 18 de xullo de 2016, un convenio de colaboración co propósito de impulsar, difundir e mellorar a transparencia na administración local de Galicia mediante unha serie de actuacións que se desenvolveron entre 2016 e 2017.





Entre outras, cabe destacar a realización dun estudo diagnóstico sobre a situación e o nivel de cumprimento de transparencia de cada un dos concellos de Galicia; o redeseño do novo Portal de transparencia local de Galicia configurado como un instrumento a disposición dos concellos para mellorar a transparencia na súa xestión, onde se estableceron diferentes categorías para facilitar tanto a publicación da información polos Concellos como a súa localización polos veciños. Ao tempo levouse a cabo un redeseño da interface da súa información, xerando un espazo máis intuitivo na súa utilización, promovendo a inserción de elementos de apoio, como buscadores, preguntas frecuentes, a elaboración de formularios tipo, modelos normalizados e a elaboración dunha Guía práctica para axudar aos concellos onde se explican as claves prácticas en relación co cumprimento das obrigas legais.

Dada a experiencia e capacidades que ten acumuladas a Universidade de Vigo na materia, e a frutífera colaboración anterior, a Vicepresidencia e Consellería de Presidencia, Administracións Públicas e Xustiza, ten especial interese en continuar colaborando con esta entidade en aras a avanzar no apoio que está a prestar aos concellos para o mellor cumprimento das súas obrigas en materia de transparencia, en concreto, en executar accións de difusión, presentación, coñecemento e propor medidas de retroalimentación do Portal de Transparencia local de Galicia, propoñer ferramentas colaborativas e actualizacións das guías e materiais a disposición dos concellos, realizar o seguimento e avaliación da transparencia a nivel municipal mediante a elaboración dun informe anual sobre Transparencia municipal en Galicia, 1ª edición e levar a cabo actividades de impulso, fomento e desenvolvemento das políticas públicas en materia de transparencia orientadas ao goberno aberto.

Para os efectos sinalados, tense previsto formalizar coa Universidade de Vigo e coa FEGAMP o instrumento convencional arriba referido por un período de vixencia que abrangue dende o día seguinte ao da súa sinatura ata o 31 de decembro de 2019.





O convenio ten por obxecto establecer as condicións polas que se rexerá a colaboración entre a Vicepresidencia e Consellería de Presidencia, Administracións Públicas e Xustiza, a Universidade de Vigo e a FEGAMP para o impulso, difusión e a mellora da transparencia no ámbito local de Galicia. En particular, o obxecto deste convenio consiste no apoio financeiro á Universidade de Vigo para continuar co apoio que está a prestar aos concellos para o mellor cumprimento das súas obrigas en materia de transparencia.

O instrumento convencional que se pretende asinar fundaméntase na necesidade de implantar a transparencia en todas as súas variantes, publicidade activa e pasiva e bo goberno, creando marcos de integridade pública. As actuacións incluídas no convenio son de claro interese público e inciden directamente nos veciños dos concellos galegos en xeral, implican unha clara mellora nas relacións entre as administracións locais e os cidadáns e o reforzo e incremento da confianza dos cidadáns na acción pública. E isto, porque a transparencia non consiste só en publicar datos sen mais, senón que a información debe de estar correctamente estruturada e ser comprensible, de xeito que a cidadanía a saiba utilizar. O exercicio da transparencia non acaba con publicar a información, senón que hai que divulgala e explicala. Só así será de utilidade e se acadará o obxectivo da transparencia.

A Vicepresidencia e Consellería de Presidencia, Administracións Públicas e Xustiza achegará á Universidade de Vigo a cantidade de 30.000,00 € para financiar as actuacións que van desenvolver o obxecto do convenio, e que se financiarán con cargo á aplicación orzamentaria e anualidades seguintes:

Aplicación orzamentaria	Ano 2018	Ano 2019
05.21.121A.444.0	13.000,00	17.000,00
TOTAL	30.000,00	

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación do texto refundido da Lei de contratos do sector público, aprobado polo Real





XUNTA DE GALICIA

**VICEPRESIDENCIA E CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA**
Secretaría Xeral Técnica

galicia

decreto lexislativo 3/2011, do 14 de novembro, con independencia de que, ao abeiro do previsto no artigo 4.2 da dita norma, lle sexan de aplicación os principios desta lei para resolver as dúbidas e lagoas que se poidan presentar.

Santiago de Compostela 14 de febreiro de 2018

A secretaria xeral técnica

Beatriz Cuña Barja

